

# INUIT ATAQATIGIIT INATSISARTUNI



UKA2021/071

4. November 2021

Agathe Fontain

**Inatsisartunut aalajangiiffigisassatut siunnersuut Naalackersuisut peqquneqassasut siunnersuuteqaqqullugit isertitanut akileraarutip inatsisartut inatsisaata allanngortinneqarnissaanik, ingerlatsiviit tamakkiisumik ilaannakumilluunniit akileraarutai 20%-imik appartinneqassammata 1. januar 2023-imiit.**

(Inatsisartunut ilaasortaq Jens-Frederik Nielsen, Demokraatit)

Siunnersuutigineqartutuut, ingerlatsinermut akileraarut 25%-miit 20 %-mut appartinneqarpat, inuiaqatigiiniit 60 mio kr, akilerneqassapput. Tassa imaappoq innuttaasut isertitassaraluaminnik 60 mio kr. amigaatigilissavaat. Isertitatigut amigaateqarnek isumaqarpoq inuttaasut tamarmik nammaqataanermikkut matussusiinissamik piumaffigineqarnerat.

Ingerlatsiviit akileraaruteqartarnerisa appartinnera kisimi imminerminik aningaasarsiornikkut siuariartormik pilersitsinaviangilaq.

Ingerlatsiviit akileraaruteqartarnerisa appartinnera ingerlatsiviit angisuut aningaasarsiornikkullu inissilluareernikut ilaqutigineqarpaassavaat, suliffeqarfeeqqanut aallartinniartunut piorsarniarlugillu angorusutatsinnut sanilliullugit.

Suliffinnik pilersitsiniarnerni, ingerlatsivinnut akileraarut kisimi isiginiarneqarnek ajorpoq, nunap politikikkut toqqissisimanera, akileraartarnermilu ilanngaait, akileraartarnikkullu nalikilliliinerit qanoq ittuuneri apeqqutaalluinnartuupput.

# INUIT ATAQATIGIIT INATSISARTUNI



Ingerlativiit sinneqartoorutitik ilumut sulisumik akissarsiaasa qaffanissaannut imaluuniit nammineq tiguinnarnissaannut pisanersut qulakkeerneqarsinnaangilaq aammalu aqunniarneqarsinnaangilaq.

Naalakkersuisut akissuteqaamminni ersersippaat 1. Januar 2020, ingerlatsiviit akileraarutaat apparneqarnikuusoq. Aatsaallu 1. November 2021-mi akileraarsimanermi naatsorsuinerit takuneqarsinnaalerumaartut.

Naalakkersuisut isumaqatigigaagut appaasimanerup sunniutai takoqqaarneqartariaqarput, massakkullu tamatumunnga nalilersuinissaq siusippallaaqaaq.

Inuit Ataqatigiinniit isumaqarpugut 1. Januar 2020-mi appaasimanerup allaanerusumik aningaasalersornissaa qulakkeeqqaartariaqaripput. Tassa pissakinnerpaanut artukkiinerpaamik atuinermut akitsuusiisimanikkut akilersornagu, ingerlatsiviit akileraartarnikkut nalikilliliisarnerisa sukateriffigineratigut 30%-imiit 25%-imut appaasimaneq aningaasalersoqqaartariaqarparput. Atuinermilu akitsuutit pissakinnerusunut artukkiinerpaanikut uterteqqaartariaqarpagut. Taamaasioreerutta aatsaat suliffeqarfinnut akileraarutip apparteqqinnissaanik eqqartuinerput nangeqqissinnaalissavarput.

Saqqummiussamimi tunngavilersuutigineqartut teori aallaavigalugu ingerlanneqarput, Kalaallit Nunaannilu pissutsit piviusut qanoq innerinut attuumassuteqaratik.

Naalakkersuisut aallannguutissatut siunnersuutaat Inuit Ataqatigiinniit taparserparput. Akileraartarnikkut aaqqissuusseqqinnissami sulinermut ilanngullugu nalilersorneqassasoq, appaasimanerup sunniutai taamanimut takuneqarsinnaalersimassammata.